

ՏԵՂԵԿՈՒԹՅՈՒՆՆԵՐ

ԱՀ պետական եկամուտների կոմիտեի 2022 թվականի հունվար ամսվա գործունեության վերաբերյալ

Ընթացիկ աշխատանքներ

Նախնական տվյալներով 2022 թվականի հունվար ամսվա ընթացքում ԱՀ պետական բյուջե մուտքագրված հարկային եկամուտները և տուրքերը կազմել են 2,656.8 մլն դրամ՝ պլանավորված 2,500 մլն դրամ ցուցանիշը գերազանցելով 6.3 տոկոսով կամ 156.8 մլն դրամով: Հավաքագրված եկամուտները նախորդ տարվա նույն ժամանակահատվածի համեմատ գերակատարվել են ավելի քան 2,5 անգամ կամ ավել է հավաքագրվել 1,626.1 մլն դրամ:

Հաշվետու ամսվա ընթացքում հարկային մարմնում հաշվառվել է թվով 90, լուծարվել՝ 3 տնտեսավարող սուբյեկտ:

Կառուցվածքային ստորաբաժանումների կողմից կատարվել են թվով 51 ուսումնասիրություններ, այդ թվում՝ 32-ը՝ հսկիչ-դրամարկղային մեքենաների ներդրման անհրաժեշտության, 9-ը՝ հարկային հաշվանցումների և վերադարձի հիմնավորվածության, 5-ը՝ ակցիզային դրոշմանիշների շարժի ու դրոշմավորման կանոնների պահպանման, 3-ը՝ ԱՀ կառավարության 2021 թվականի ապրիլի 19-ի N 336-Ա որոշմամբ հաստատված միջոցառման 8-րդ կետով նախատեսված վնասի չափի հիմնավորվածության ճշտության և 2 այլ ուսումնասիրություններ:

Հարկ վճարողներին սպասարկող ստորաբաժանումների կողմից ընդունվել և մշակվել է 5,899 հաշվարկ-հաշվետվություն, որից էլեկտրոնային եղանակով՝ 5,259:

Էլեկտրոնային եղանակով հաշվետվությունների ներկայացման նպատակով հարկ վճարողների հետ կնքվել են թվով 35 պայմանագրեր:

Հաշվետու ամսում «Հարկերի մասին» ԼՂՀ օրենքի 30-րդ հոդվածի համաձայն՝ կայացվել և ուժի մեջ են մտել հարկային մարմնի կողմից վերահսկվող եկամուտների գծով չկատարված պարտավորությունների գանձման 2 որոշումներ՝ 4.3 մլն դրամ գումարի չափով, ԱՀ ԱՆ հարկադիր կատարումն ապահովող ծառայություն ներկայացվել հարկային մարմնի կողմից վերահսկվող եկամուտների գծով չկատարված պարտավորությունների գանձման թվով 7 որոշումներ՝ 35.8 մլն դրամ գումարի չափով:

Վարչական իրավախախտումների վերաբերյալ ԼՂՀ օրենսգրքով սահմանված կարգով քննված 1 վարչական գործով սահմանվել է 10.0 հազար դրամ գումարի չափով վարչական տուգանք:

Հարկ վճարողների ձեռնարկատիրական վարկերի (փոխառությունների) և տոկոսների փոխհատուցման նպատակով վճարված հարկերի գումարի վերադարձի ծրագրի շրջանակում հաշվետու ամսում կատարվել է 523.6 մլն դրամ գումարի չափով վերադարձ:

Եռամսյա ժամկետով հարկային արտոնություններից օգտվելու նպատակով գործունեությունը նոր սկսող 5 հարկ վճարողների տրամադրվել են հավաստագրեր:

2021 թվականի դեկտեմբեր ամսվա ընթացքում ԱՀ տարածք են ներմուծվել 11,768.2 մլն դրամ գումարի չափով ապրանքանյութական արժեքներ, արտահանվել՝ 11,677.1 մլն դրամ գումարի չափով ապրանքանյութական արժեքներ:

ԱՀ կառավարության 2021 թվականի ապրիլի 19-ի N 336-Ա որոշման համաձայն՝ հաշվետու ամսում շարունակվել է 2020 թվականի սեպտեմբերի 27-ին Արցախի Հանրապետության դեմ սանձազերծված պատերազմական գործողությունների հետևանքով կրած նյութական վնասի չափի վերաբերյալ տեղեկանք տրամադրելու նպատակով հարկ վճարողներից դիմումների ընդունման գործընթացը, որի շրջանակում տրամադրվել է 1 տեղեկանք, մերժվել՝ 1 դիմում:

Հաշվետու ամսում ԱՀ ՊԵԿ նախագահի հրամանով ներդրվել է պետական եկամուտների կոմիտեի պետական ծառայության պաշտոն զբաղեցնող անձանց հաշվետվողականության համակարգ: Ի կատարումն Արցախի Հանրապետության Նախագահի մոտ հունվարի 11-ին անցկացված խորհրդակցությունում տրված հանձնարարականների՝ կոմիտեի նախագահի հրամանով ստեղծվել է ռիսկային ոլորտներում իրականացվող հսկողական աշխատանքները համակարգող աշխատանքային խումբ, նախանշվել վարչարարության ոլորտում առաջիկա անելիքները:

Ուսումնասիրվել են պետական կառավարման այլ մարմինների կողմից ներկայացված իրավական ակտերի նախագծերը և տրվել առաջարկություններ:

Հաշվետու ամսվա ընթացքում Հայաստանի Հանրապետության և Արցախի Հանրապետության հարկային մարմինների համագործակցության ծրագրի շրջանակներում իրականացվել են ԱՀ հարկ վճարողների կողմից ՀՀ մաքսային սահմանով կատարված ներմուծումների, արտահանումների, ՀՀ և ԱՀ սուբյեկտների միջև իրականացված գործարքների, անուղղակի հարկերի հաշվանցումների, ինչպես նաև հարկման հիմք հանդիսացող այլ փաստաթղթերի, տեղեկությունների փոխանակման աշխատանքներ:

Հասարակայնության հետ կապ

Հարկային կարգապահության բարելավման ծրագրի շրջանակում հաշվետու ամսում կոմիտեի աշխատակիցների կողմից հարկ վճարողների մոտ իրականացվել են բացատրական աշխատանքներ գործունեությունը օրենսդրության պահանջներին համապատասխան կազմակերպելու վերաբերյալ, տրամադրվել 1110 անհատական իրազեկման թերթիկներ: Կազմակերպվել են նաև երկու հանդիպում-քննարկումներ՝ առաքում իրականացնող և առևտրի ոլորտում գործունեություն ծավալող խոշոր ու միջին հարկ վճարողների հետ:

Հանրային իրազեկման աշխատանքներ են իրականացվել նաև հարկային մարմնի պաշտոնական ինտերնետային կայքի և զանգվածային այլ լրատվամիջոցներով, տրվել հարկային կարգապահության բարձրացմանն ուղղված քարոզչական բնույթի հայտարարություններ:

«Հարկերի մասին» ԼՂՀ օրենքի 30.1-ին հոդվածով սահմանված կարգով հրապարակվել է 2021 թվականի արդյունքներով առաջին 300 խոշոր հարկ վճարողների վերաբերյալ տեղեկատվական ցանկը:

Հունվար ամսվա ընթացքում հարկային մարմին է մուտքագրվել 279, ելքագրվել՝ 139 նամակ-գրություն, որոնք ընթացքավորվել են ըստ գործող կարգի, այդ թվում՝ հարկային օրենսդրության դրույթների պարզաբանման նպատակով ներկայացվել է 2 գրություն: